

辨

證

錄

辨證錄卷之十

山陰陳士鐸敬之甫號遠公又號朱華子著述

會稽陶式玉尚白甫號存齋又號

叅訂

鶴膝門

人有足脛漸細足膝漸大骨中痠疼身漸瘦弱人以爲鶴膝之風誰知水濕之入骨乎夫骨最堅硬濕邪似難深入何竟入於膝乎此因立而行房所成也凡人行房必勞其筋骨至於精泄之後則髓必空虛髓空則骨空邪卽乘其虛空而直入矣若膝則筋骨聯接之處骨靜而

膝動動能變而靜不能變也不變者形消能變者形大
但其病雖成於腎精之虛而治病斷不可單治其腎因
所犯者濕耳濕乃陰邪陰邪必須以陽氣祛之腎之精
陰水也補精則精旺陰與陰合陰無爭戰之機不戰而
邪何能去故不當補精而當補氣方用蒸膝湯生黃芪
八兩金釵石斛二兩薏仁二兩肉桂三錢水煎二碗先
服一碗卽擁被而卧覺身中有汗意再服第二碗必兩
足如火之熱切戒不可坐起任其出汗至汗出到湧泉
之下始可緩緩去被否則萬萬不可去也一劑病去六

半再劑病全愈此方補氣未免太峻然氣不旺不能週
遍於一身雖用利濕健膝之藥終不能透入於邪所犯
之處而祛出之也第大補其氣而不加肉桂之辛熱則
寒濕裹住於膝中亦不能斬關直入於骨髓而大發其
汗也至於絕不治風者以此病原無風也若作風治愈
耗其氣安得取效哉

此症用加吟芪

桂湯亦妙

黃芪三兩肉桂三錢破故紙二錢牛膝
三錢水煎服服必有大汗如雨二服愈

一鶴膝之症有二一本於水濕之入骨一本於風濕之入

骨也前條乃言水濕入骨未言風濕入骨之症大約水濕之病骨重難移風濕之症骨輕可走至於痠痛則一也雖然痠痛亦有微別水濕之痛在一處而不遷風濕之痛移來移去而無定治法不可徒治風濕也用散膝湯治之黃芪五兩防風三錢肉桂五錢茯苓一兩水煎服服後亦擁被而卧聽其出汗不必驚惶汗出愈多去病愈速夫黃芪原畏防風得防風而功更大吾多用黃芪正恐人之難受加入防風能於補中以行其氣得肉桂之辛散引入陽氣直達於至陰之中又得茯苓共入

膀胱利水濕之邪內外兼攻內既利水而外又出汗何風濕之不解哉惟是大汗淋漓人恐有亡陽之懼誰知用散藥以出汗若爲可慮今用黃芪補氣以出汗乃發邪汗而非損正汗也邪汗能亡陽正汗反能益陽耳所以二劑而收全功也

此症用薤白防

桑湯亦效

防風三錢桑葉二兩陳皮一錢破故紙二錢薤白一兩白朮一兩水煎服亦必出大汗而愈只消一劑也

癘風門

人有頭面身體先見紅班後漸漸皮破流水成瘡以致鬚眉盡落遍身腐爛臭穢不堪人以爲大麻風也誰知是火毒結成之病乎大麻風之病南粵甚多以其地長蛇虫熱毒之氣爨住於皮膚之間濕蒸之氣又藏遏於肌骨之內故內外交迫蘊結不能遽宣反致由班而破由破而腐也此係最惡之病不特南粵多生此病也蓋毒氣何地蔑有濕熱乃天地所成正不可分南北也治法必以解毒爲先然而近人元氣虛者甚衆徒瀉其毒未

必不先損其正惟是補正又恐引邪入內要當於補中散邪爲妙方用散癘湯蒼朮三錢熟地一兩佗參一兩蒼耳子三錢車前子二錢金銀花二兩薏仁五錢水煎服連服十劑可半愈也再服十劑必全愈此方補腎健脾又有散風去濕化毒之品則攻補兼施正旺而邪退也倘純用寒涼或全用風藥鮮有奏功者矣

此症用黃金湯亦效

大黃五錢金銀花半斤水煎汁三碗分作三次服一日服完必然大瀉惡糞後單用金銀花三兩連服十日全愈

人有生大麻風者不必盡在兩粵之中往往居於兩粵之

外而亦生者人以火毒之入身也誰知感酒濕之毒而成之者乎夫酒氣薰蒸最能害人或卧於酒槽之上或坐於酒缸之邊皆能成病大約多得之行房之後蓋行房泄精則毛竅盡開酒氣易中其病與大麻風無異但兩粵之病必相傳染於家人父子之間獨感酒毒而成者止在本人而他人無恙也治法雖瀉火毒仍須兼化酒毒爲妙方用解癘神丹茯苓三錢白朮五錢薏仁五錢黃連一錢玄參一兩金銀花三兩柞木枝三錢水煎服連用十劑永爛者可愈已爛者再服二十劑可愈也

此方健脾去濕化毒解酒正氣無傷邪氣易退倘認癰
風純是火毒單用祛毒瀉火之味置酒濕於不問非善
治之法也然酒濕之毒何以別之聞酒香而生憎飲美
醞而添疼此乃感酒毒而成者也倘若聞酒香而流涎
飲美醞而作癢者非感酒毒乃感火毒也

此癰成於酒毒亦可用黃金湯加
作木枝五錢照前服之得瀉而愈

遺尿門

人有夜卧遺尿者其人畏寒喜熱而黃體怯大便溏泄小便必勤人以爲小腸之虛誰知腎氣之虛乎夫腎與膀胱爲表裡膀胱之開闔乃腎主之也蓋膀胱奉令於腎腎寒則膀胱自不尊腎之令故腎不閉而膀胱亦不閉也治法約腎之水而水寒不若溫腎之水而水縮也方用溫泉飲白朮一兩巴戟天一兩益智仁三錢肉桂一錢水煎服一劑卽止遺連服四劑不再遺矣此方脾腎兩補之法肉桂溫命門之寒益智斷膀胱之漏且白朮

通腰臍之氣自然病與藥宜蓋遺尿之病雖成於腎寒亦由腰臍之氣不通則水不走於小腸而竟走於膀胱也通其腰臍之氣則水迂迴其途自走小腸小腸與心爲表裡而心氣能攝之而不遽遺也且白朮又上能補心之氣心氣虛則水瀉心氣旺而水又難瀉矣心腎交而泉溫亦心腎交而泉縮矣

此症可用朮朮

益桂湯治之

山茱萸五錢白朮一兩肉桂

一錢益智仁一錢水煎服

人有年老遺尿者不必夜卧而遺也雖日間不睡而自遺

較前症更重此命門寒極不能制水也夫老人孤陽何至寒極而自遺乎蓋人有偏陰偏陽之分陽旺則有陰虛火動之憂陽衰則有陰冷水沉之患少年時過泄其精水去而火又何存水火必兩相制者也火無水制則火上炎水無火制則水下泄老人寒極而遺正坐水中之無火耳惟是補老人之火必須於水中補之以老人火衰而水亦不能甚旺也方用八味地黃湯熟地一兩山茱萸一兩山藥五錢茯苓二錢澤瀉一錢丹皮一錢附子一錢肉桂一錢水煎服連服二劑溺卽止矣服十

日全愈約照此方分兩修合丸散每日服一兩永不再
遺八味地黃湯正水中補火之聖藥水中火旺則腎中
陽氣自能通於小腸之內下達於膀胱膀胱得腎之氣
能開能閤一奉令於腎何敢私自開關聽水之自出乎
氣化能出卽氣化能閉也惟是八味湯中茯苓澤瀉過
於利水老人少似非宜丹皮清骨中之熱遺尿之病助
熱而不可助寒故皆略減其分量以制桂附之橫斟酌
得宜愈見八味湯之妙然此方但可加減而不可去畱
加減則奏功去畱則寡效也

此症亦可用助

老湯治之

熟地一兩 山茱萸一兩 益智一錢 肉桂二錢 遠志一錢 炒棗仁五錢 人參三錢 北五味二錢 水煎服

人有憎熱喜寒面紅耳熱大便燥結小便艱澀作痛夜臥反至遺尿人以爲膀胱之熱也誰知是心火之炎亢乎夫心與小腸爲表裡心熱而小腸亦熱然小腸主下行者也因心火太盛小腸之水不敢下行反上走而顧心及至夜臥則心氣趨於腎小腸之水不能到腎只可到膀胱以膀胱與腎爲表裡到膀胱卽是到腎矣然而膀胱見小腸之水源欲趨腎意不相合且其火又盛自能

化氣而外越聽其自行全無約束故遺尿而勿顧也治
法將瀉膀胱而膀胱無邪將補膀胱而膀胱又未損正
然則奈何瀉心火之有餘而遺尿自止矣方用清心蓮
子飲加減治之茯苓三錢麥冬三錢竹葉三十片蓮子
心三錢黃連二錢白芍五錢陳皮五分丹皮二錢天門
冬三錢紫苑一錢玄參三錢水煎服一劑少利再劑大
利三劑全愈此方專清心火不去止小腸之水蓋此等
遺尿愈止而愈遺也

此症亦可用加減逍遙散治之

茯苓白芍當歸車前子各五錢山藥丹皮各三錢柴

胡黃連各一錢人參五分陳皮三分甘草五分水煎服

脫肛門

人有脫肛者一至大便則直腸脫下而不肯收久則澀痛
人以爲腸虛下陷也誰知陽氣之衰不能升提乎夫脫
肛之症半成於脾泄泄多則亡陰陰亡必至下墜而氣
亦下陷腸中濕熱之污穢反不能速去爲快於是用力
虛努過於用力直腸隨努而下矣迨至濕熱之邪已盡
脫肛之病已成必須升提陽氣佐之去濕去熱之劑然
而提氣非用補氣之藥則氣不易升補氣不用潤腸之
味則肛無難脫要在兼用之爲妙也方用提腸湯人參

三錢黃芪五錢當歸三錢白芍一兩升麻一錢茯苓三錢槐米一錢薏仁五錢水煎服連服四劑肛腸漸升而人再服四劑不再脫此方補氣以升提則氣舉於上焦一身之滯氣自散潤腸則腸滑濕熱自行矣

此症亦可用加

味補血湯

黃芪當歸各五錢升麻一錢北五味子十粒連服十劑全愈

人有不必大便而脫肛者疼痛非常人以爲氣虛下陷也誰知大腸之火奔迫而出之乎夫大便屬金原屬於肺肺與大腸爲表裡休戚相關大腸不勝火氣之炎燒不

得已欲求救於肺而肺居膈上遠不可救乃下走肛門
聊爲避火之計肛門旣屬於肺大腸畏火豈肛門獨不
畏火耶况魄門與大腸旣有同氣之好禍難相救寧忍
坐棄故以已之地方甘心讓客而已身越境以避其氣
此肛門直腸所以脫出於糞門之外也疼痛者火焚被
創無水以養故乾燥而益疼也此等之病用升提之法
全然不效反增其苦楚蓋升提之藥多是陽分之品陽
旺則陰虛陰虛則火益勝安有取效之日哉治法宜急
瀉其腸中之火火息而金自出矣然而大腸之火不生

於大腸也胃火盛而大腸之火亦盛腎水乾而大腸之水亦乾單治大腸之火而不瀉胃中之火單治大腸之水而不益腎中之水則大腸之水不生而大腸之火亦不息何以使大腸之氣返於腹中肛門之腸歸於腸內哉方用歸腸湯玄參一兩石膏三錢熟地一兩丹皮三錢當歸三錢地榆三錢槐花二錢荆芥炒黑三錢水煎服一劑痛安再劑腸升三劑全愈此方胃腎同治兼去清大腸之火水源不斷則火氣自消有不急返者乎客去而主歸此必然之理也

此症用榆地玄

歸湯亦效

地榆三錢當歸一兩玄參一兩生
地一兩水煎服連用十劑全愈

強陽不倒門

人有終日舉陽絕不肯倒然一與女合又立時泄精精泄之後隨又興起人以爲命門之火誰知陰衰之極乎夫陰陽原兩相平者也無陽則陰脫而精泄無陰則陽孤而勢舉二者皆能殺人彼此相較陰脫之症驟而死陽孤之病緩而死似乎驟而死者難治緩而死者易醫而孰知陰脫之症其陽不絕補陽可以攝陰陽孤之病其陰已涸補陰難以制陽蓋陽生陰甚速陰接陽甚遲故脫陰留陽者往往可援孤陽無陰者每每不救耳雖然

陰根於陽補陽而陰可生安在陽不根陰而補陰卽不能生陽乎使強陽不倒之人尚有一線之陰在則陰必可續而可生陰旣生矣則陽不爲孤陽陰日旺而陽日平誰謂非死裡求生之妙法乎方用平陽湯玄參三兩山茱萸一兩沙參二兩地骨皮一兩丹皮一兩水煎服連服二劑而陽不甚舉矣又服四劑陽又少衰矣再服四劑陽平如故此方純是補陰之藥更能涼其骨中之髓又恐過於純陰與陽有格格不入之意復加入山茱萸陰中有陽也使其引陰入陽以制其太剛之氣真善

於制剛也。倘見其火旺之極，妄用黃柏，知母以寒涼折之，毋論水不可以滅火，反激動其龍雷之怒，陰不能入於陽之中，陽反離夫陰之外，有不至於死亡而不可得也。

此症亦可用濟陽湯治之。
熟地二兩，玄參、麥冬、沙參各一兩，久服自安。

人有終日操心，勤於誦讀，作文之時刻，苦搜索，及至入房，又復鼓勇酣戰，遂至陽舉不倒，胸中煩躁，口中作渴，兩目紅腫，飲之以水不解，以爲陽旺之極，誰知心腎二火之齊動乎？夫心腎無一刻不交，心交於腎，則腎火無

飛騰之禍腎交於心則心火無亢烈之憂若日勞其心則心不交於腎夜勞其腎則腎亦不交於心心腎不交則水火無既濟之好覺一身上下無非火氣於是心君失權腎水無力而命門之火與心包之火反相合而不相離骨中髓動髓海煎熬肝中龍雷之火亦起而相應三焦之火亦且附和以助其炎上之勢火盡上升陽無所寄勢不得不仍歸於下下又難藏因走於宗筋陰器之間陽乃作強而不可倒矣此等之病至危之症也非迅解二火陽何能倒然解火又禁用寒涼以直折其火

蓋二火乃虛火而非實火惟有引火歸經少用微寒之品以退其浮遊之火則火自歸源而鮮決裂之虞方用引火兩安湯玄參一兩麥冬二兩丹皮五錢沙參一兩黃連一錢肉桂一錢水煎服一劑而火少衰二劑而陽乃倒矣連服四劑而火乃定減黃連肉桂各用三分再服數劑兩火不再動矣此方補陰以退陽補陰之中又無膩重之味得黃連肉桂同用以交心腎心腎合而水氣生水氣生而火自解况玄參麥冬沙參又是退火之味仍是補水之品所以能退其浮遊之火解其亢陽之

禍也

此症亦可用加

減濟心丹

人參炒棗仁各五錢熟地玄參麥冬丹皮各
一兩蓮子心茯苓各三錢水煎服四劑卽安

發斑門

人有身不發熱胸脇之間發出紅斑不啻如絳雲一片人
以爲心火熱極誰知胃火之鬱極乎夫胃火本宜炎上
何鬱滯不宣蓋風寒外束之也火欲外出遇寒遏抑之
則火不得出而內藏然而火蘊結於胃中終不能藏之
也於是外現於皮膚發紅雲之斑矣此時以涼藥逆投
之則拂其熱之性而變爲狂以熱藥治之則助其火之
勢而增其橫必須以風藥和解之爲得又不可竟用風
藥也大約火旺者水必衰不補其水僅散其火則胃中

燥熱何以解氛不得風而愈揚乎誠於水中散其火則火得水而有制水佐風而息炎斑且消滅於烏有斷不至發汗亡陽以成不可救之症也方用消紅湯乾葛二錢玄參一兩當歸一兩芍藥五錢升麻一錢生地一兩麥冬一兩甘草一錢天花粉二錢水煎服此方補陰以制火涼血以化斑但用散而不用寒但用和而不用戰自然鬱宣而熱滅水旺燥除何斑之不盡消哉

此症用散雲

湯亦神

葛根三錢青蒿五錢生地一兩玄參一兩升麻一錢貝母三錢麥冬五錢水煎服二劑愈

人有滿身發斑非大塊之紅赤不過細小之斑密密排列
斑上皮膚時而作癢時而作痛人以肺火之盛也誰知
肺火之鬱乎蓋肺主皮毛肺氣行而皮毛開肺氣鬱而
皮毛閉其所以鬱者以心火刑金外遇寒風之吹肺火
不得達於皮毛而斑乃現矣然則肺之生斑仍是內熱
之故治法仍宜瀉火然火鬱於皮毛不用解表而驟用
瀉火之品反能遏抑火氣不向外達反致內攻勢必至
表症變爲裡症尤可虞也故必須散表之中佐以消火
則散斑自速也方用散斑飲玄參五錢升麻二錢白芷

一錢荊芥二錢甘草一錢麥冬五錢生地一兩黃連一錢天花粉三錢水煎服一劑斑消二劑全消此方散多於清者以清火則火愈鬱而氣不宜散風則風盡解而火亦息也

此症亦可用蘇葉解斑湯

蘇葉三錢生地三錢麥冬五錢甘草一錢桔梗二錢升麻一錢貝母二錢當歸五錢水煎服二劑愈

火丹門

人有身熱之後其身不涼遍身俱紅紫之色名曰火丹人
以爲熱在胸膈誰知熱在皮膚乎夫火丹似與發斑相
同何分二名不知二病熱雖相同而症實各異蓋發斑
者紅白相間也火丹者一身盡紅也發斑熱鬱於內而
發於外火丹熱鬱於外而趨於內發於外者有日散之
機趨於內者有日深之勢故發斑之症輕火丹之病重
然不知消火之法輕者未必不變爲重苟知散鬱之方
重者亦變爲輕也故治火丹之病補其水之不足散其

火之有餘使火外出不在內攻可也方用消丹飲玄參
三兩升麻二錢麥冬一兩桔梗二錢生甘草一錢水煎
服一劑丹化不必二劑此方用玄參解其浮遊之火以
麥冬滋其肺金之氣用桔梗升麻表散於毛竅之間用
甘草調和於臟腑經絡之內引火外行所以奏功神速
耳

此症亦可用防
桔湯治之

防風一錢麥冬玄參各一兩桔梗三錢甘草一錢
天花粉二錢黃芩二錢水煎服一劑輕二劑愈

人有赤白遊風往來不定小兒最多此症似乎發斑但發

斑有一定之根赤白遊風無一定之色人以爲三焦之實火誰知是胃火之鬱熱乎夫胃火不鬱必有發汗亡陽之禍正惟火鬱不宣則熱不在外而在內矣然而火盛自必由內達外而外又不可遽達於是或發於此而移於彼或現乎白而改乎紅竟無有定象耳論其治法自宜以清熱爲主而清熱必須涼血然血寒則凝滯不行雖血能止火而終難散火必須行血以舒熱耳方用清火消丹湯生地一兩丹皮三錢甘草一錢玄參三錢牛膝二錢赤芍二錢荆芥二錢天花粉一錢水煎服連

服二劑而丹消矣再服二劑全愈此方涼血而兼行血
清火而並散火既無大寒之虞自無甚熱之慮鬱易開
而火易達矣

此症用荊芥祛
風湯治之

荊芥二錢甘草一錢半夏五分麥冬
五分當歸三錢白芍三錢水煎服

人有滿身發斑色皆黃白斑上有水流出時而作疼久之
皮爛人以爲心肝二經之火誰知脾肺之濕熱乎蓋火
丹原有二症一赤火丹一白火丹也赤丹皮乾白丹皮
濕赤丹屬心肝之火白丹屬脾肺之濕然而熱鬱於皮

毛則赤白乾濕一也夫濕從下受其病宜在下身何上身亦成黃白之丹乎蓋脾爲肺之母脾病子願代母以受其苦將濕氣分散於皮毛火熱亦隨之而外越然而脾病肺尚不至十分之切膚所以濕熱之邪畏肺氣之健不敢徑從皮毛而泄反畱戀於皮毛之中而色乃外現黃白耳治法利其水濕之氣解其火熱之炎仍從膀胱下走皮毛正不必外逐也蓋濕熱之盛原在脾不在肺母逐其仇子有不隨之而共逐者乎所以祛其脾之濕熱而肺中之濕熱不逐自散方用除濕逐丹湯防風

三分蒼朮三錢赤茯苓五錢陳皮五分厚朴一錢猪苓
一錢山梔子三錢甘草三分白朮三錢薄桂三分水煎
服連飲數劑丹退而愈此方利水多於散火者以濕重
難消水消則火亦易消也

此症用桑白分

解散亦效

薏仁二兩澤瀉三錢升麻一錢天花粉
三錢桑白皮三錢神曲三錢水煎服

離魂門

人有心腎兩傷一旦覺自己之身分而爲兩他人未見而已獨見之人以爲離魂之症也誰知心腎之不交乎人身之心腎無刻不交心不交於腎則夢不安腎不交於心則神發躁然此猶心病而腎不病腎病而心不病也故夢雖不安魂猶戀於心之中神雖發躁魂尚依於腎之內魂欲離而不能離也惟心腎之兩虧則腎之精不能交於心而心之液不能交於腎而魂乃離矣雖然魂藏於肝未聞藏於心腎也心腎虧而肝氣未傷則肝能

藏魂何便至於離哉不知肝之母腎也肝之子心也肝居於心腎之間腎虧則無水以生肝而肝傷矣心虧則無液以耗肝而肝又傷矣肝傷則血燥血燥則魂不能藏往來於心腎母不能生子不能養魂安得不離哉治法似宜大補其肝血以引其魂之入肝矣然而魂雖入肝心腎未補仍耗損肝木之氣魂卽暫歸而復離必須兼補心腎之爲得也方用攝魂湯生棗仁五錢麥冬一兩熟地一兩白芍一兩當歸五錢山茱萸五錢人參一兩茯神五錢遠志二錢巴戟天五錢柏子仁三錢白芥

子二錢水煎服一劑而魂合爲一矣連服數劑不再離也此方心肝腎兼治腎水潤而肝不燥肝血旺而心不枯心欲交於腎而肝通其氣腎欲交於心而肝導其津自然魂定而神安神安而目一不至有岐視之分也

此症用合魂

丹亦可治

人參五錢茯神三錢炒棗仁一兩熟地二兩蓮子心五錢巴戟天一兩水煎服一劑而魂合矣

人有終日思想情人杳不可見以至夢魂交接醒來又遠隔天涯日日相思宵宵成夢忽忽如失遂覺身分爲兩能知戶外之事人以爲離魂之症誰知心肝之氣鬱乎

夫肝本藏魂氣鬱則肝氣不宜宜乎魂之不出矣不知
肝鬱必至尅脾思想又必傷脾脾土一傷卽不能輸精
於心肝之內而心氣必燥肝又因鬱而血乾無津以潤
心則心更加燥心燥則肝氣不安日欲出氣以顧心而
情人不見心中拂抑愈動其鬱鬱極火炎而魂不願藏
於肝中乃隨火外出之爲快魂旣外出而軀壳未壞故
能回顧其身視身爲二也治法必須舒肝氣之鬱滋心
氣之燥兼培其脾土使土氣得養生津卽能歸魂矣方
用舒魂丹人參一兩白芍一兩當歸五錢白朮五錢茯

神五錢麥冬五錢丹砂末一錢菖蒲一錢柴胡一錢鬱
金一錢天花粉一錢甘草一錢水煎服一劑而魂定二
劑而身合爲一矣此方心脾肝同治之法也而舒肝爲
其病成於鬱解鬱而神魂自定然則舒魂丹卽舒肝之
丹也

此症用歸魂

飲亦效

白芍二兩人參五錢貝母香附各三
錢鬱金一錢水煎服二劑而魂歸矣

人有狂症初起身在牀上能知戶外之人口中罵詈嫌家
人不出戶迎入人亦爲離魂之病誰知胃火犯心乎夫

心火本生胃土有母子之誼何故犯心使心神之出外不知胃土乃心之嬌子也胃弱則心火來湊於胃胃強則心火反避夫胃矣蓋心火寧靜胃火沸騰當胃火焚燒之時胃且自身不顧安顧其父母乎其犯上作亂弑逆之事往往不免故心君姑息寧下堂而走以避胃火之焚燒所以心神外出成離魂之危病也夫魂既離身宜隨出隨死何尚有一二日之苟延因心神雖出而心氣猶未絕耳救法舍人參竹葉石膏湯別無二法然必須大劑煎之悉其酣飲庶几可救否則尚在生死之間

也方中最宜多者石膏也其次必多人參大約石膏
宜用二兩人參須用一兩兼而施之實奪魂之妙藥也
倘因循不用或用此方畏首畏尾少用石膏人參均無
濟於返魂也或謂多用石膏少用人參未爲不可嗟乎
定狂原止藉石膏之多返魂非人參不可蓋魂已外越
一時回宮必搖搖靡定若不多用人參何以安神使之
不再離耶此人參之所以必當多用耳

此症單用玄參三兩水煎服二劑而魂不離也

疰夏門

人有時值夏令便覺身體昏倦四肢無力朝朝思睡全無精神脚痠腿軟人以爲疰夏之病誰知腎水之虧乏乎夫夏令火炎全藉腎水之潤則五臟六腑得以灌注不至有乾燥之患然而夏日正當水衰人之腎水未有全旺者也凡人至夏雖多困倦但未若疰夏之甚疰夏者腎水虧乏乃冬不藏精之故也精不藏於冬火難勝於夏故困乏矣雖然夏令火勝多傷脾胃人之困乏自是脾胃之氣衰弱故也與腎水似乎無涉詎知腎中無水

不能分潤於脾胃則脾胃水乾何能制外火之旺乎火
無水制脾胃受火之刑則脾胃無津僅可自顧勢難轉
輸於手足四肢無力精神倦怠亦其宜也治法必須健
脾開胃爲主脾健胃開則所用飲食自然變化精微以
生腎水又得補腎之藥以蒸動脾胃之氣則水土不相
尅而相生何慮疰夏之病哉方用勝夏丹白朮二錢茯
苓二錢陳皮三分人參五分北五味子三分熟地五錢
山茱萸二錢神麴三分白芥子一錢山藥三錢芡實二
錢炒棗仁一錢水煎服每日一劑服十劑精神煥發矣

再服十劑身體健旺此方視之若平平無奇而輕重多寡配合入妙既無陽勝之虞又無陰衰之弊醒脾胃之氣生心腎之津可久餌以取效亦可近服以圖功也

此症用鼓神湯亦效

熟地麥冬各五錢白芍地骨皮沙參各一錢甘草貝母各三分人參神麴各五分白朮三錢丹皮一錢水煎服日服一劑服一月精神自旺不困倦矣

人有三伏之時悠悠忽忽懶用飲饌氣力全無少貪美味腹中悶脹少遇風涼大便作瀉人以爲疰夏之病誰知脾氣之困乏乎夫人之先天乃腎後天乃脾也脾氣健則所用飲食自化精微足以供腎水之不足苟或春冬

之際先傷脾土則土衰難以化物所用飲食勢必停住於胃中腎水無脾土之資生則腎氣更涸何能分布於筋骨此精神氣力之倦乏也似乎治法宜急補其脾矣然脾土非腎火不生腎火非腎水不長故補脾者必須補腎中之水火也方用八味丸熟地八兩山茱萸四兩山藥四兩澤瀉丹皮茯苓各三兩附子一枚甘草水製之肉桂二兩蜜爲丸每日晚服八錢服半月健飲服一月飽悶除矣服兩月疰夏之病全愈夫肉桂補火而六味丸則純補水者也補水之味多於補火則火得水之

益而不燥土得火之利而不濕矣此仍補先天以益後天之法也

此症用健脾飲亦效

白朮 薏苡 各五錢 茯苓 山茱萸 白芍 各三錢 人參 二錢 甘草 五分 當歸 牛膝 麥冬 各三錢 北五味 三分 肉桂 一錢 水煎服 連服一月 精神自健

脚氣門

人兩跗忽然紅腫因而發熱兩脛俱浮作疼作痛人以爲傷寒之病誰知是脚氣之症乎夫傷寒症中原有脚氣之門然而脚氣非傷寒也脚氣感染濕熱先從下受傷寒感冒風寒先從上受故傷寒乃陽症而脚氣乃陰病也夫濕熱下感宜從下治若用風藥散之濕邪反致上犯以風藥多陽升之藥也陽升陰邪一至犯心卽死非陰變陽之謂也所以治脚氣之病斷不可以傷寒法治之宜下消其濕熱濕從下行身熱自解方用消跗散茯

苓一兩茵陳一錢防己一錢炒梔子一錢薏仁一兩澤瀉三錢木瓜一錢水煎服一劑小便利二劑身熱解再用二劑而腳腫消再服二劑全愈此方利小便之水使濕熱之氣盡從膀胱下泄總有邪氣無不盡散不必又去散邪也夫膀胱者太陽之經也風邪初入多在膀胱膀胱大利邪又何居况腳氣原無風邪不過膀胱氣壅下不行而上發熱今治下而下通上何不通之有上下氣通身熱自解一用風藥則引陰濕而入於陽分反成不可治之症矣散邪之藥斷斷不可用也是以脚氣之

病卽生於冬月尚不可用散邪之藥矧春夏秋之令哉

此症用順導

湯亦佳

茯苓澤瀉各五錢肉桂三分木瓜一錢龍胆草一錢車前子三錢水煎服

中邪門

人有無端見邪口中大罵以責自己口吐頑涎眼目上視
怒氣勃勃人不可犯人以爲中邪之病誰知是中肝氣
之邪乎夫邪各不同大約不離五行者近是而此病中
邪實中木氣之邪也但邪之中人必乘人氣之虛而入
倘人之肝氣不虛則木邪何從而入哉故治木邪者必
須補正正氣旺而邪氣難留也雖然邪氣甚旺一味補
正則邪且格拒而不許入須於補正之中佐之祛邪之
味則邪自退舍而正氣日旺邪不必爭戰而膽散矣方

用逐客湯柴胡二錢茯苓五錢半夏三錢白芍一兩炒
梔子三錢菖蒲一錢枳壳一錢神麴二錢甘草一錢白
朮三錢白礬二錢水煎服一劑神定二劑怒平三劑罵
詈止痰涎漸消四劑全愈此方平肝氣而瀉火補肝血
而化痰痰火既清邪又何藏况方中半是攻邪之藥木
邪卽旺何敢爭戰乎有棄之而去矣

此症用定魂

湯亦妙

白芍二兩炒梔子三錢甘草一錢半夏三錢
肉桂三分枳壳一錢水煎服一劑而魂定矣

人有猝然遇邪一時卧倒口吐痰涎不能出聲發狂亂動

眼珠大紅面如火燒紅色髮或上指此中心氣之邪也
夫心屬火邪中心宜火邪之犯心也然心君清淨之宮
不可犯邪一犯卽死斷不能邪附於身多延時日而不
死者此乃火邪犯膻中之府非犯心君之臟也第膻中
爲心君之相臣邪入膻中逼近於心包絡犯邪心中驚
戰謹閉其臟何能頒發討邪之令哉爲相臣者惟恐貽
害於心君怒氣填胸上現於面目皆盡裂憤極而髮乃
上指此邪激之使然也雖然邪之入也膻中招之不治
膻中之虛而惟瀉火邪則正氣愈虧邪氛益旺非治法

之善也方用助肺祛除湯人參五錢茯苓三錢甘草一錢生棗仁三錢遠志二錢半夏三錢黃連二錢枳壳一錢白薇二錢白芥子三錢水煎服二劑邪退此方助臆中之正氣益之瀉火消痰之品則邪不敵正邪且自遁消滅於無踪矣

此症用涼心

丹亦神

人參茯苓丹參各五錢黃連半夏各三錢吳茱萸五分黃蒲一錢生薑五片麥冬一兩水煎服二劑即安人有一時中邪目見鬼神口出胡言或說刀斧砍傷或言弓矢射中滿身疼痛呼號不已人亦以爲中邪譫知是

中肺氣之邪乎夫肺屬金邪盛乘肺氣之虛而入自是金氣之邪其神必金甲將軍其鬼必猙獰之狀或斷頭折臂帶血淋漓者有之似乎邪從外入非由內召也然而肺藏魄者也肺氣一虛魄且外遊魄屬陰與神鬼原爲同類其感召諸邪尤易入體且肺主皮毛肺氣虛皮毛之竅盡開邪乘空竅而入於腑由腑而入於臟又何難哉故治此邪必須治肺氣也但肺爲嬌臟治肺之藥不能直入於肺則攻邪之藥何能直達於肺乎肺之所畏者火也肺之所喜者土也補其脾胃之土則肺之正

氣自旺瀉其心經之火則肺之邪氣自衰於補土瀉火之中少佐以消痰逐邪之味可也方用助金祛邪丹麥冬一兩茯苓五錢黃連五分蘇葉一錢桔梗二錢甘草一錢白朮三錢人參一錢陳皮一錢天花粉三錢神麴二錢水煎服一劑心清二劑魄定三劑邪散矣此方心肺脾胃四經同治之法也攻邪之中不傷正氣所以正氣既回邪氣卽散矣

此症用安魂散亦神

桔梗三錢甘草一錢青黛五錢百部一錢山豆根一錢人參三錢茯苓五錢天花粉三錢水煎服一劑卽安

人有粹中邪氣眼目昏花或見婦女之妖嬈或遇兒童之嬌媚兩目注戀彼此調笑遂至心魂牽纏語滯亂低聲自語忽忽如失皆謂中邪然此邪乃腎氣之水邪也夫邪每乘人邪念而入古人云心正何懼邪侵故正氣未衰則邪正兩途烏能相併惟正氣既虛而邪念又起是予邪以入門之機也但腎有補無瀉今人之腎氣無不虛者腎虛宜正氣亦虛矣腎之有補無瀉者言腎之真陰非言腎之正氣正氣虛而邪火旺邪火旺而邪氣生所以正氣未瀉者雖真陰少虧邪不能入惟真陰大

虧正氣又喪邪始得而憑之治法必須補腎之正氣邪
氣不必治也蓋攻腎中之邪必損腎中之正故攻邪之
法不在攻腎而在攻胃以胃爲腎之關也邪在腎之關
門而腎之正氣不能上通於心故作鄭聲之語搗其關
門之邪正所以救腎也方用搗關救腎湯人參五錢白
朮一兩山藥一兩芡實五錢薏仁一兩白芥子三錢澤
瀉三錢半夏三錢玄參五錢知母一錢厚朴一錢水煎
服一劑痰涎消二劑心魂定三劑全愈此方治胃之邪
仍是治腎之藥雙治之法也或謂治腎不宜治胃以胃

在上而腎在下也何以治胃而能愈不知入腎之藥必先入胃後入於腎故瀉胃邪卽所以瀉腎邪也今兼治之則二經之間邪俱無藏身之地是以不必多劑卽能奏功耳

此症用益智助

神湯亦效

白朮熟地各一兩白芥子天花粉炒黑荆芥各三錢山茱萸巴戟天各五錢水煎服四服全愈

人有感邪氣於一時卽狂呼大叫見人則罵大渴索飲身體出汗有似亡陽然而亡陽之症必然躁動中邪之病惟高聲呼叫而身卧於牀絕無有登高踰垣之事聽木

聲而大笑聒人語而開顏見天光而若畏曦日色而如
驚人以爲陽明之熱病也誰知是中土氣之邪乎夫脾
胃屬土脾屬陰胃屬陽土邪多不正之氣故病兼陰陽
所以難治也攻其陽而陰邪未去必有逗遛之患搗其
陰而陽邪仍在更多狂越之炎必兼陰陽兩治邪始不
敢停畱耳方用兼攻湯石膏五錢人參三錢白朮一兩
厚朴二錢天南星三錢半夏三錢陳皮一錢麥冬一兩
水煎服一劑神定二劑神安三劑全愈此方脾胃兼治
瀉陽火以平胃祛陰痰以養脾脾胃氣旺則邪難侵正

人生以脾胃爲主土邪之相侵以土附土也何反稱難
治不知正土之氣得邪土之氣相間則正土必崩土之
正氣衰以致土之邪氣入可不急補正氣乎故諸邪襲
人皆宜急補正氣而土邪尤宜補正倘徒攻其邪則十
人十死不可不戒也

此症用培土飲

治之亦神效

人參三錢白朮一兩茯苓五錢半夏三錢
附子三分玄參一兩水煎服二劑愈

人有爲鬼魅所憑經歲不愈裸體瞠目大詬且祛人不使
近醫藥治之卽傾於地無可如何人以爲邪氣之入心

也誰知是火熱之在胃乎夫胃火一發多不可救何鬼
魅憑之反不發狂乎蓋狂症乃自己發狂非己不欲狂
而代爲之狂者也代爲之狂仍是祟而非病也第無祟
者可以治狂而有祟者治狂而藥不能入口將奈何矣
狂病未有不胃熱也熱病見水未有不心快朶願者也
吾用水以解熱卽用水以定狂方用軫水散用蚯蚓數
十條搗爛投水中攪勻少頃去泥取此淨水一大盆放
於病者之前切不可勸其飲水病者見之色喜必自飲
之而安卧醒來狂定祟亦去矣夫祟最喜潔而惡穢蚯

蚓入水則水穢矣穢宜鬼魅之所惡然而水則投病者之喜病者欲自飲祟不得而禁之也蚯蚓解胃中之惡又善清心故入口爽然也心清而熱又解祟又安能憑而復狂哉

此症用解魅

丹亦神效

白礬二錢甘草黎蘆一錢水煎執病人灌之一劑必大吐而愈不可再劑也

中妖門

人有偶遇妖狐歲久纏綿不肯遽去以致骨瘦形枯與死
爲鄰者本難治療以妖狐惟盜人之精也精爲人生根
本根實先撥僅存軀壳安得久乎雖然狐媚之盜人精
者必使人昏迷而後取是乘人夢中竊之也苟用藥得
宜尚可接續以夢中竊盜腎根未漓也若大補病人之
精仍爲狐媚所取漏卮又何能補必須用內外兼治之
法狐媚可祛也內治方名爲斷媚湯巴戟天一兩人參
一兩熟地一兩山茱萸五錢茯苓五錢水煎服日日一

劑外治方名爲却媚丹。花椒一錢，生附子三分，射香一分，砂仁三粒，細辛三分，瓜蒂三枚，三柰一錢，各爲細末。用蜜調男搽陰莖頭上，并根下；女搽陰門內外。狐見之必大罵而去，不敢再犯。一連七日敷之，若來卽敷，其迹自斷而斷媚湯必須服一二月也。內治之藥不過補其心腎之虧，用外治方者，以狐媚迷人，先以唾送入人口，入燕其津，卽刻昏迷，彼卽乘人之迷，乃用舌戰人，亦如夢非夢，聽其口吮，樂甚而忘其泄精也。外治之藥皆狐媚所畏，吾卽因其所惡而制之也。

此症用輪精

湯亦妙

熟地二兩已戟天一兩肉蓯蓉麥冬各五錢
北五味一兩水煎服服後宜便漱口卽去

人有感遇蛇妖綢繆繆繆數月之後身體乾枯皮膚燥裂
宛如蛇皮之斑此蛇祟也蛇係至陰之物能盜至陽之
氣肺屬氣肺氣盡爲蛇妖所吸則肺氣不能生津津枯
則肺無所養皮毛者肺之所主也內旣不能養肺肺將
何津以養皮毛乎此燥裂如斑之形見也治法必須補
肺氣之不足然而補氣益助邪之所喜不若用解毒之
藥入之健脾利水之中則邪氣易散正氣可回耳方用

逐蛇湯白芷一兩白朮二兩蒼朮一兩車前子一兩水煎服小便中必有黑氣噴出隨洩而泄也一連四服則皮膚之斑少軟後以雄黃二兩白芷二兩各研細末滾水煮數沸乘熱薰洗之如是者三日斑乃盡消仍服逐蛇湯四劑而愈愈後再用四君子湯加味治之人參三錢白朮一兩生甘草二錢茯苓三錢麥冬一兩天門冬五錢百合一兩沙參五錢水煎服一月可復元也否則蛇毒雖解羸弱之極恐變成癆瘵矣或問服逐蛇湯蛇妖禁不許服柰何不知蛇最懼者白芷也將前藥在病

人房中煎之彼聞氣而疾遁矣何敢作祟乎但煎藥之時不可令病人知道備藥之時亦不可令一人知也人苟不知妖斷斷不覺耳

此症用蒼黃散亦神

人參三錢蒼木雄黃各一兩煎湯沐浴數日即止祟

人有身體伶仃有皮無肉胸脇間長成鱗甲然健飯如故人以爲與龍交也然人與龍交則其人身雖變成鱗甲必然有肉蓋其人爲龍所愛豈有喪人性命之理且人與龍交龍必轉與之精氣其人久且變龍遇風雨而化去蓋龍壽萬年龍亦水中之仙也人變爲龍卽人化爲

水仙耳安有僅存皮骨者乎然則前症非龍交也乃龍盜人之氣故肉盡消耳雖然真氣爲龍所盜則人宜死矣何故猶存人世而胸脇長成鱗甲耶不知龍止吸人之氣不吸人之精龍屬陽而惡陰人之精水屬陰故龍不食也胸脇生鱗甲者龍吸人之氣不能一口吞嚥呼吸之間以龍氣回冲而龍涎偶沾濡於人之胸脇遂至生長鱗甲耳治法必須化龍之毒大補其真氣則無氣可以生氣無肉可以長肉也方用解鱗丹人參三兩白朮二兩茯苓一兩生甘草五錢肉桂二錢白礬二錢丹

砂末三錢麥冬五錢當歸一兩白芥子三錢水煎服一劑鱗甲盡消再劑氣旺減藥之半連服十劑人之肉生再服十劑全愈此方補氣爲君少佐之白礬丹砂龍毒何以易消乎蓋白礬最能軟堅而化痰丹砂最化魚龍之毒二味入於補氣之中全無干礙所以合用成功也但丹砂必須同藥共煎切不可生用調服蓋丹砂生用無毒熟用則有毒取其以毒攻毒也或問龍吸人之氣則人之陽氣盡散宜胃氣消亡不宜健飯如故詎識胃爲腎之關腎精未喪則腎火猶存腎火上蒸而胃火接

續胃氣升騰所以可救倘胃氣消索雖有解鱗湯之奇亦無可如何矣

此症用增味補

氣湯亦神

人參當歸各一兩黃芪二兩蒼朮三錢雄黃一錢水煎服服十日而鱗甲隱矣漸生肉也

人有山林之間偶遇少婦兩情眷顧遂與野合泄精如注倦極困卧醒來少婦已失所在玉莖微痛明日大痛三日之後腫如黃瓜之樣人以爲野合浪戰之傷誰知是花妖之毒哉夫花木之精有何毒不知樹木歲久始能成精物經長久未有無毒者况花木經數千百年之後

其孔隙之間安保無蛇蟲所居得日月之靈氣雖已成精而毒氣畱存未化也雖然木氣慈仁花妖每不殺人不過盜人精氣以圖自化其身不意孔隙之間畱毒尚在以致玉莖腫痛花木之精不皆陰物有化老人者有化道士者有化秀士者不止化女人以迷惑男子也化女者多使人玉莖腫痛化男者反無恙耳所以老樹成精往往得婦人之精氣便能立變爲人或投胎奪舍而去惟化女者未免貽害男子天所以惡其過而使斬伐之也故花妖每不能成人耳樹妖與花妖均盜人精氣

而樹妖得成正果者以其求道心切又不壞人天所以
怒而成之也倘樹妖純盜人精氣不死不休者仍爲天
之所怒非遭斧斤之厄卽遇霹靂之震耳玉莖腫痛妖
再不至者畏天耳然人何以治之乎方用安陰湯生甘
草五錢茯苓五錢蚯蚓二條葱二枝黃柏三錢水煎服
一劑卽消不必再劑也以渣再煎湯洗之此方用生甘
草以解毒用茯苓以利水蚯蚓者最善消腫黃柏祛火
葱能發散同羣共濟引毒直走膀胱從陰器而出毒出
而腫自化矣

此症用射柏丹

外治亦佳

炒黃柏五錢射香一錢生甘草一錢各爲細末香油調搽三日愈

人有邂逅少艾目挑心許或投以佩帶勾以語言遂至引入家門兩相配合晨夕肆淫形體消瘦初不知其爲山魃也久則時隱時現常去常來彼必自稱仙子號曰真人旦能體病人所欲飲饌金物等項心思得之立時猝至皆可用之而無疑惟是山魃來時必欲人盡去其衣裸體而戰不似他妖之喜掩飾也此等之怪甚於花木之妖輕於狐狸之祟蓋狐狸盜人之精不盡不止山魃

止吸人之氣適可而止也然而狐狸之祟易祛山魃之魅難遣以山魃亦具神通未便以草木之藥治之也夫山魃陽妖耳陽妖自必喜陽而山魃則喜陰故逢女則易合也然其性最喜潔惡穢裸體而戰者正恐女子之穢其體也治法卽以穢治之方用善穢湯犬肉二兩先煮湯二碗入人參一兩紅鉛紙一片肉苁蓉三錢二蚕沙三錢雞卵二枚山羊血一錢龍骨末一錢秋石一錢水煎服山魃知煎此湯必在房中大罵須令人鑼鼓喧天大鬧於房外彼必大笑然後以此湯灌病人之口得

飲一口山魃知之大笑而去乘其去後急以狗血塗病人之面與下身不便之處少頃彼必再來見此等形狀斷必絕交不再至也此乘其好潔而亂之也

此症用蒼狗湯

治之亦神

蒼术一斤狗血一斤和在一處水一斤再和合一處煎數沸將病人身體遍擦彼必大罵而去所擦之人亦將血水擦面妖即不能暗擊矣但煎藥之時須在鄰舍無人處煎之妖不能知也

人有遊於洲渚之間或遇矮人或見長老鬚眉頰白道貌可觀引至其家談心論性時往時來莫能踪跡此有道士之士卽是怪物何必拒之間有化秀士以鬪風流變妖

姬以逞姣好乃美言相挑以珍物相贈人爲所惑遂至
野合久之採戰吸精盡情縱慾人逐之而不避人罵之
而生噴飛沙走石壞屋倒廬世多不識其怪誰知是魚
鰲元龜之族哉夫水族之怪不能離水何以登岸而作
祟耶不知凡物之倫生於世者年至千歲皆能變化爲
人既能變化有何陸之不可遊行乎千歲之物往往出
而迷人者亦其慕道之心太切耳蓋人之氣最靈物得
之可以入道但其初心亦不過欲竊人之靈氣未常有
害人之念也故天亦置而不問迨既與人接欲盡取之

而後快遂動殺人之心於是作祟興妖之事起人始知是妖而謀共逐之矣治法又不同於祛他妖之法以他妖生於陸內魚鱉元龜生於水耳方用硫黃數兩研末煎湯遍洒於病人之室與病人之家房中時時燒之使氣味充閭彼必畏縮而不敢入更用蒼朮一兩白朮二兩煎湯日與病人服之更將二味之渣襍之硫黃煮薰病人之衣服褥被自此永絕其跡矣二朮乃純陽之氣妖聞之最惡况加入硫黃相尅之物安得不畏避哉

此症用遠邪餅亦神

胡椒四兩乾薑一斤炒蒼朮一斤各爲末取蘆柴燒

灰和勻成餅在房內焚餅薰之三日
即斷跡矣如無蘆柴用炭末亦妙

中毒門

人有服砒礪之毒疼痛欲死苟不急救必至腐腸爛胃吐
嘔紫血而死蓋砒礪乃天生之石未常經火煅煉何以
毒至如此不知砒礪生於南岳之山鍾南方之火毒又
經火氣則其氣大熱毒而加熱則酷烈之極安得不殺
人耶且其性又善走下喉必升降於腸胃之上下腸薄
皮穿人乃死矣天下毒藥之橫莫此爲甚救法必須吐
出其毒然而雖經吐出不能盡出其毒必須用解毒之
味世人往往用羊血以吐之亦有能生之者但初下喉

之人可救食之多時久入胃中則無益矣我有一方得
之異人所傳久暫皆可救方名救死丹生甘草二兩瓜
蒂七個玄參二兩地榆五錢水煎服一下候卽吐再煎
渣服之又吐砒礪之毒必然全解甘草最善解毒得瓜
蒂必上湧而吐砒礪原能上升故引之而盡出也然而
砒礪又善下行得玄參地榆最解大腸之火毒砒之大
毒從上而出走下者不過餘毒耳又得玄參地榆而解
之則上下共相解氛毒何能施其燥烈之虐哉况玄參
地榆俱是潤中解毒所以能制其酷也大約此方用之

十人中斷可救八人惟服下不能吐者此腸胃已壞不可救矣非藥之無效也幸人急救之可耳倘藥不及煎飲於飯鍋中煮前藥汁灌之庶不致因循失救也

此葢用苦參湯救之亦神妙

苦參二兩煎湯一碗一氣服之卽大吐而愈

人有服斷腸草者初則胸前隱隱作疼久則氣不能通及至腹痛大小便俱不能出而死夫斷腸草卽鉤吻也至陰之物狀似黃精但葉有毛鉤子二個此物最善閉氣猶能使血不行動氣血閉塞故爾人死非腸果能斷也閩廣之間多生此物婦女子小忿往往短見偷食覓死如

飢取其不大痛楚也世亦以羊血灌之得吐則生然亦有服羊血不肯吐者往往不救不知斷腸之草殺人甚緩苟用解毒通利之藥無不生者不比砒毒酷烈方用通腸解毒湯救之生甘草一兩大黃一兩金銀花一兩水煎服一瀉而愈不必二劑此方用金銀花生甘草以解其毒用大黃迅速以通其氣毒解氣通斷腸之草何能作祟哉

此症用白礬

湯亦神

白芍三兩白礬五錢當歸丹皮各一兩柴胡三錢附子一錢水煎服一劑氣通即愈

人有食漏脯充飢致胸膈飽滿上吐下瀉大腸如刀割疼
痛瀉不可止而死者有之夫漏脯卽隔宿之肉食屋漏
之水滴入而名之也似乎無甚大害何以成毒殺人此
言歲久之屋樑塵甚多屋上必有蛇蝎行走塵灰倒掛
係蜘蛛蛸蠚結成無非毒物天雨之水順流而下凡毒
氣得水則化然化於水中也水入肉食之內毒將何往
自然結於脯中而不化矣以毒物充飢安得不變生不
測哉但世多食漏脯不死又是何故其屋必非歲久之
屋未曾經蛇蝎行走故耳食之雖不至死病則斷不能

免所以漏脯爲太上所戒倘人悞食疼痛吐瀉急用解毒之藥可以得生方用化漏湯山查三錢生甘草五錢大黃三錢厚朴三錢白芷二錢麥芽二錢水煎服一劑毒盡出矣二劑痛定不必三劑此方消其肉食則脯易變化後以大黃推蕩之白芷甘草從中解毒則順流利導易於祛除也

此症男用山查湯妙

齊莖汁三大碗用山查肉三錢神麴三錢麥芽生甘草各三錢水一碗連汁同煎取二碗頓服之吐瀉止卽愈

人有飲吞鴆酒白眼朝天身發寒顫忽忽不知如大醉之

狀心中明白但不能語言至眼閉卽死夫鳩毒乃鳩鳥之糞非鳩鳥之羽毛亦非鶴頂之紅冠也鳩鳥羽毛與鶴頂紅冠皆不能殺人不過生病惟鳩糞則毒此鳥出於異國異國之人恐言鳥糞則人必輕賤故但名爲鳩以貴重之也此鳥非蛇蝎不食故毒勝於孔雀之糞孔雀之糞冲酒飲之有死有不死鳩酒飲之則無不死矣蓋鳩毒性熱而功緩善能閉人之氣所以飲之人卽不能語言發寒顫者心中熱也心脉通於眼中之大眥心熱則目必上視眼閉而死者心氣絕而目乃閉也幸其

功緩可施救療之法無如世人未知鐸逢異人之傳何
敢自隱飲鴆者倘眼未閉雖三日內用藥尚可活方用
消鴆湯金銀花八兩煎湯取汁二碗用白礬三錢寒水
石三錢菖蒲二錢天花粉三錢麥冬五錢再煎一碗灌
之一時辰後眼不上視口能出言再用前一半如前法
煎飲二劑而愈斷不死也嗟乎鴆毒之殺人醫經並未
有言沒可以救療者世人服鴆毒亦絕少似可不必傳
方然而人事何常萬一有悞飲鴆酒者以此方救之實
再生之丹也

此症用加味連草湯亦可救

黃連三錢生甘草一兩菖蒲一錢貝母三錢生薑汁

半茶鍾竹瀝半茶鍾水煎一碗服之

卽解不必二服得吐猶愈之速也

人有食鱉而腹痛欲死往往有手足發青而亡者夫鱉雖
介屬本無大毒然鱉之類多屬化生有蛇化者有龜化
者有魚化者龜魚所化俱能益人惟蛇最毒其鱉腹之
下必有隱隱蛇皮之狀且其色大紅斷不可食食必殺
人人苟悞食腹必大痛以毒氣之攻腸也手足發青者
手足屬脾毒中於脾外現於手足也治法不可解鱉之
味而仍當解蛇之毒方用白芷三錢雄黃末三錢山查

一錢丹砂末一錢枳實一錢茯苓五錢水煎服一劑疼
痛止二劑穢毒出矣不必三劑此方白芷雄黃俱是制
蛇之藥而山查丹砂善化魚肉之味合而用之則蠶毒
易消加入枳實茯苓者枳實最能去積茯苓尤能利水
水族之物毒隨水化更易於解散耳

此症用駒溺

湯甚神

馬尿一碗生甘草一兩水煎服得吐
卽愈不吐卽再飲二煎無不愈者

人有道途之間悞服濛汗之藥以致頭重脚輕口吐涎沫
眼瞪不語此迷心之故也山東村店最多此藥乘其一

時心迷以取財物醒來多不記憶恍恍惚惚辨別不真其藥大約用天仙子爲君加入狐心等物雖不至殺人然久迷不醒亦爲可畏世人以涼水解之亦能少醒但涼水入心水停心下倘係虛人必變他症非解法之善也方用止迷湯茯苓五錢生甘草三錢瓜蒂七枚陳皮五分水煎服卽大吐而醒其從前情景斷不遺亡不似涼水之解如醉如痴也蓋茯苓通其心生甘草解其毒陳皮清其痰寬其中又得瓜蒂上通使藥不停心一吐氣清神朗不至五臟反覆也或問濛汗藥必是痰迷心

竅宜用生薑以開之何故不用未審止迷湯中可少投薑汁否耶不知漾汗藥中用天仙子居多天仙子得姜而愈迷其心矣故中其毒者斷不可輕與薑湯反致久迷耳

此症用解漾湯亦神效

黃連枳殼各一錢天花粉白芥子神麴人參各三錢

生甘草瓜蒌各二錢茯神五錢

附子一片水煎服一劑卽解

人有遊兩粵之間或與婦女交好或與男子成仇多下蠱毒於飲食之中人食之則面目漸黃飲食倦怠或一年或三載無藥解之必至暴死世傳蠱毒土人將各毒蟲

與蛇蝎等物投於缸中聽其彼此相食食完止存一物
不死者取之以爲蠱母此訛也蓋彼地別有蠱藥乃天
生之毒也土人治蠱有方法可解大約皆用礬石以化
蠱惟恐外人知之故秘而不言礬石清痰又善化堅蠱
積於腹中內必堅硬外以痰包之所以一物兩用奏功
頗神惟是人身柔弱者多剛強者少又得蠱毒結於胸
腹之間必然正氣大虛倘徒用礬石不更虛其虛乎必
須於補氣補血之中而加用消痰化蠱之藥則有益無
損始稱萬全方用破蠱全生湯人參一兩茯苓五錢當

歸一兩生甘草三錢白礬三錢半夏三錢水煎服一劑
胸腹爽再劑胃氣開三劑蠱毒漸消於烏有矣此方補
氣血之虧化痰涎之礪正氣既旺邪氣自消況有攻堅
消蠱之品蠱何能再聚而不散哉

此症用散蠱丸亦佳妙
白礬人於鴨蛋內火煨爲枯礬後用茯苓一斤白木
一斤枯礬四兩同爲絕細末米飲爲丸
每日白滾水送下三錢不須服完愈

人有誤食竹間之藁或輕吞樹上之菌遂至胸脹心疼腹
痛腸瀉而死夫藁菌之物亦芝草之類竹根樹柯生藁
生菌者以土之濕熱也其下必叢聚蛇蝎惡蟲其氣上

騰葦菌得氣溫而不寒易於生發故較他產更加肥壯其味最美而其氣實毒也方用解菌湯救之生甘草二兩白芷三錢水煎服服後乃用鵝翎掃其咽喉引其上吐必盡吐出而愈卽或已過胃中鵝翎探引不吐亦必腹疼下瀉可慶安全蓋生甘草原是解毒之神品又得白芷最解蛇毒相助同攻自易下逐而盡消也

此症用白礬五錢瓜蒂七枚水煎服非吐卽瀉而愈

人有食牛犬之肉一時心痛欲吐不能欲瀉不可此毒結於心胃不升不降也論理亦宜用吐法然亦有探吐之

不應者夫牛犬乃資補精血之物何以有毒此必牛犬
抱病將死未死之時又加束縛以激動其怒氣毒結於
皮肉心肝之間人不知而食之適當其處故食而成病
重至暴亡也治法消化其肉食佐之以解毒之品則脹
悶一寬即可不死方用消肉化毒丹山查三錢枳壳一
錢神麴三錢雷丸三錢厚朴一錢大黃三錢水煎服一
劑而大下之則犬牛之肉盡消而出不必二劑然此方
乃下逐之神方倘可上湧不必用此苟用吐法不效急
用此方無不可救療也

此症用黃蘗
飲亦神效

大黃當歸各五錢山查肉蘿蔔子各三錢枳
壳檳榔各一錢柴胡五分丹皮二錢水煎服

人有一時短見服鹽滷之毒必至口鹹作渴腹中疼痛身
蹇脚縮而死夫鹽能補腎何便殺人不知鹽滷味苦苦
先入心心遇鹽滷心氣抑鬱不通鹽滷見心不受乃犯
於腎腎見其味苦腎又不受遂往來於心腎之間心腎
之氣不交而鹽滷流入於腸而不可救矣蓋大小腸最
惡鹽滷入之必縮小其腸而成結腸結而氣又不通安
得不蹇曲而死乎治法必用甘以解之方用生甘草三

兩煎湯救之如服瀉未久生甘草湯中加淡豆豉一兩
同煎飲之必吐如服已久生甘草湯中加入當歸二兩
同煎飲之腸潤未必皆死也要在人活變耳

此症亦可用歸冬榆草湯救之
生甘草二兩當歸一兩麥冬一兩地榆五錢水煎服

人有恣飲燒酒大醉而死其身體必腐爛臭穢夫酒爲大
熱之物况燒酒純陽無陰尤爲至熱者乎多飲過度力
不能勝一時醉倒熱性發作腐腸爛胃往往不免必須
用井水頻撲其心胸解其頭髮浸頭於冷水之中候溫
卽易涼水後用解炎化酒湯救之人參一兩柞木枝二

兩黃連三錢茯苓五錢菖蒲一錢寒水石三錢水煎服
一碗以冰水探冷灌之得入口中卽不死矣此方以枳
木解其酒毒黃連寒水石解其火毒菖蒲引入心中用
茯苓以分消其酒濕之氣然必用人參以固真氣者使
氣不隨酒俱散蓋燒酒係氣酒也熱極則氣易散越固
其真氣而火可瀉毒可解也倘止瀉其火而解其毒火
瀉毒解而氣脫矣氣脫而身將何在哉此人參之所以
必用苟無人參以黃芪二兩代之可也

此症用地龍湯
救之亦神妙

蚯蚓二十條葱四十條同搗爛如泥以井水二碗
漉過取汁一碗灌醉人口中即可保其不死也

人有愛食河魴以致血毒中人舌麻心悶重者腹脹而氣
難舒口開而聲不出若久不治亦能害人大約肝經血
燥而胃氣又弱者多能中毒蓋河魴乃魚中之最善怒
者也食之自能動氣況肝經血燥之人則肝氣自急以
急投急安有不增其急暴之氣乎氣急而腹難舒故心
悶也氣急而聲難出故舌麻也治法吐出其肉則氣舒
腹寬聲出而口閉何至有心悶舌麻之症哉方用瓜蒂
散加味治之瓜蒂七枚白茅根一兩蘆根一兩水煎汁

飲之必大吐吐後前證盡解不必再服古人有拚死食河魴之語亦是愛食之也其實河魴不能殺人但與性怒者不甚相宜耳

此症用蘆姜湯

救之亦神效

神麴三錢半夏二錢茯苓三錢蘆根
汁一碗生薑汁一合水煎一劑卽安

腸鳴門

人有腸中自鳴終日不已噯氣吞酸無有休歇人以爲脾氣之虛也誰知是肝氣之旺乎夫肝木不鬱則脾氣得舒腸亦安然輪輓順流而下何至動不平之鳴耶惟肝木尅脾土則土氣不能伸而腸乃鳴矣蓋坤道主安寧者也惟地中有風震動之聲出如霆如雷非明驗乎故治腸鳴之病不必治腸治脾土而已亦不必專治脾土治肝木而已肝木之風靜脾土之氣自靜也方用安土湯白芍一兩白朮一兩柴胡一錢茯苓三錢甘草一錢

蒼朮二錢神麴二錢炮薑一錢水煎服一劑少止二劑
全止不必三劑此方脾肝同治之法肝平而脾氣得養
矣脾安而腸氣得通矣不必止鳴而鳴自止者妙在行
肝氣之鬱居多所以奏功特神耳

此症用香梔平

肝飲亦佳

炒梔子三錢茯苓白芍白朮各五錢
陳皮甘草各一錢香附二錢水煎服

人有飢餓之後腹中腸鳴手按之鳴少止者人以爲大腸
之虛也誰知胃氣之虛乎蓋胃氣者陽氣也胃與大腸
同合陽明之經胃屬足陽明大腸屬手陽明也故陽明

胃燥大腸亦燥陽明胃虛大腸亦虛大腸之糟粕必由胃而入大腸氣虛必得胃氣來援今胃氣既虛僅可自顧安能分布於大腸此大腸匱乏所以呼號求濟於同經之胃而頻鳴也治法必須助胃氣之弱方用實腸湯黃芪一兩茯苓五錢山藥五錢白朮一兩甘草一錢神麴二錢五味子一錢肉果一枚水煎服一劑而腸鳴止連服四劑不再發此方大補胃中之氣絕不去實大腸治胃而腸鳴自止故卽謂之實腸湯

此症用加味四

君湯亦妙

白朮三錢茯苓二錢人參穀芽各一錢
甘草神麴各五分砂仁一粒水煎服

人有腸中作水聲者如囊裹漿狀亦腸鳴之病也誰知是水畜於大腸乎夫大腸之能開能闔者腎火操其權也腎熱而大腸亦熱腎寒而大腸亦寒大腸寒而水乃注於中而不化故作水聲也雖然大腸能容糟粕而不能容水水入大腸必隨糟粕而出何以但作水聲不隨糟粕而卽出耶蓋大腸之下爲直腸直腸之下爲魄門乃肺操其政非腎操其政也肺憐腎之弱欲救之而無從未常不惡邪水之入腸也肺居上游不能禁邪水之不

入於腸實能斷邪水之不出於腸况大腸與肺爲表裡
肺氣不下行大腸之氣亦因之而不洩魄門正肺之門
也肺門謹鎖大腸之水又何從而出乎所以愈積於其
中作褻漿之聲也治法補命門之火兼利其水則水從
膀胱而化矣方用五苓散治之白朮五錢茯苓五錢猪
苓澤瀉各一錢肉桂三錢一劑而膀胱之水若決江河
而大出矣二劑而腹中之水聲頓息蓋五苓散本是利
水之聖藥我多加肉桂則腎氣溫而直走膀胱水有出
路豈尚流入大腸哉故不必治大腸而自愈也

此症用消滯

飲亦效

茯苓山藥各一兩芡實五錢肉
桂一錢車前子二錢水煎服

自笑門

人有無端大笑不止或背人處自笑異於平素者人以爲心家有邪熱也誰知心包之火盛乎其狀絕似有祟憑之孰知絕非祟也倘祟憑其身必有奇異之徵不止一自笑而已臚中爲心之相過熱則權門威赫妄大自尊縱欲窮奢無所不至隨地快心逢人適意及其後有不必喜而亦喜不可樂而亦樂是豈相臣之素志亦權大威傾勢驅習移而然也臚中火盛發而自笑正相彷彿耳治法惟瀉心包之火笑自止矣方用止笑丹生棗仁

三錢黃連二錢犀角屑五分丹砂末一錢丹皮三錢生甘草一錢麥冬三錢茯神三錢丹參二錢天花粉二錢水煎服一劑笑可止二劑笑全止三劑全愈此方瀉心包之火仍是安心君之藥蓋心中清明包絡自不敢有背主私喜之事故安心正所以安心包也

此症用蒲柏

飲亦效

菖蒲一錢玄參麥冬各一兩柏子仁三錢貝母一錢水煎服四劑愈

人有笑哭不常忽而自哭忽而自笑人以爲鬼祟也誰知積痰類祟乎夫心虛則不能自主或哭或笑之病生蓋

心氣虛而不能生胃而胃氣亦虛矣胃氣既虛水穀入胃不化精而化痰痰將何往勢必仍畱於胃中胃苦痰濕之蕩漾必取心火之氣以相資而心虛不能生土痰卽乘勢入於心宮心惡痰之相犯堅閉不納又恐胃土之沉淪故心痺而作痛也痛至則哭痛失則笑何崇之有治法以化痰之藥動其吐痰出而哭與笑皆愈矣方用茯苓五錢白朮五錢甘草二錢陳皮三錢半夏二錢竹瀝二合水五碗煎三碗頓服之以鵝翎掃其咽喉必吐痰升許而愈蓋痰在上焦非吐則痰不能出非用二

陳湯爲吐藥則舊疾雖出新痰又積笑哭正無止期惟用二陳湯爲吐藥則新舊之病一治而永愈也

此症用加味參

茯飲亦效

人參茯苓各五錢半夏三錢天花粉三錢
甘草一錢竹瀝二合附子一片水煎服

人有無故自悲涕泣不止人以爲魅憑之也誰知爲臟燥之故乎夫臟燥者肺燥也內經曰悲屬肺肺之志爲悲又曰精氣併於肺則悲是悲泣者肺主之也肺經虛則肺氣乾燥無所滋潤哀傷欲哭之象生自悲出涕者明是肺氣之匱乏也肺虛補肺又何疑乎然而肺乃嬌臟

補肺而肺不能遽受益也必須補其肺金之母土旺而金自旺矣虛則補母正善於補肺耳方用轉輸湯人參三錢甘草二錢小麥五錢大棗十枚白朮五錢茯苓三錢水煎服十劑全愈此方用參朮茯苓補脾土也土旺而肺金安有再弱之理惟肺燥善悲不潤肺解燥反助土生火不益增其燥乎不知助土生火正助金以生氣也氣旺而肺之燥自解小麥成於麥秋有秋金之氣焉入於參朮苓甘之內全無真火之氣所以相劑而成功也

此症用加味參朮湯妙
人參天花粉生地各五錢白朮麥冬各一兩水煎服

惱怒門

人有少逢拂意之事便覺怒氣填胸不能自遣嗔惱不已
人以爲肝氣之逆也誰知肝血之少乎夫肝性急宜順
不宜逆惱怒之事正拂抑之事也拂抑必致動怒怒極
必致傷肝輕則殮泄重則嘔血者甚多然此乃猝然而
至肝經因怒而成病者也若肝血少者不必有可怒之
事而遇之大怒不必有可惱之人而見之甚惱蓋血少
則肝燥肝燥則氣逆也故同一氣惱之症須分虛實以
治之前症乃實後症乃虛也雖然實者火實非血之實

也虛者血虛非火之虛也所以虛實之症前後若有異
治虛治實之法實彼此無有殊耳方用解怒補肝湯白
芍一兩當歸五錢澤瀉一錢柴胡一錢荆芥一錢甘草
一錢枳殼三分丹皮三錢天花粉二錢水煎服一劑氣
平連服數劑自然不易怒也此方全是平肝之藥非瀉
肝之品也肝得補而血生鬱得血而易散肝氣不鬱惱
怒何能動乎卽或天性多乖平時無病尚多氣惱安得
惱怒之不生哉然多服此藥亦可免嘔血殮泄之症也

此症用加味歸

芍湯亦效

當歸白芍各一兩生地麥冬各五錢
天花粉炒梔子各二錢水煎服

人有晨夕之間時多怒氣不必有可怒之事而心煩意躁不能自遣至夜則口乾舌燥止有一更睡熟餘則終夜常醒人以爲肝血之少也誰知是腎水之匱涸乎夫肝爲腎子肝子不足由於腎母之不足也蓋肝屬木而木必得水以灌溉則枝葉敷榮今腎水日日耗去腎且自顧不遑則肝木零仞勢所不免况有境遇之拂抑自然肝益加燥無津液以養心此卧之所以不安也治法必須大滋腎水甘霖大降則田疇漫渥槁者立蘇萌芽條

達無非快心之景也自然心火取給於腎腎水足濟夫
心而肝木之氣往來相通而順適矣方用潤肝湯熟地
一兩山茱萸四錢白芍五錢當歸五錢五味子一錢玄
參二錢丹皮三錢炒梔子一錢水煎服十劑夜卧安又
十劑而怒氣息又十劑雖遇可怒之事亦且不怒矣是
方補腎者六補肝者四也絕不去治心而心氣自交於
腎者因腎水之足則心不畏木火之炎可通其交腎之
路也

此症用萸芍熟地湯亦效
熟地二兩山茱萸一兩白芍一兩水煎服

瘖啞門

人有口渴之極快飲涼水忽然瘖啞不能出聲人以爲心火亢熱也誰知肺氣之閉乎夫肺主氣氣通則聲音響亮氣塞則聲音瘖啞蓋肺屬金金實則不鳴耳但肺金最惡心火火來刑金宜爲金之所畏金不敢出聲理也何得水而反閉耶不知水來尅火則火必爲水所尅金雖幸水之尅火猶恐火之刑金肺氣隨水氣而下降金沉於水底何能自鳴耶此種瘖啞乃水抑肺氣而不升非肺氣之自敗治法宣揚肺氣分消其水濕不治瘖啞

而瘖啞自鳴矣方用發聲湯枇杷葉五片貝母二錢茯苓五錢百部一錢蘇葉一錢麥冬三錢甘草一錢玄參五錢桑白皮三錢水煎服一劑聲少出再劑聲大出矣三劑全愈此方宣通肺氣則肺氣自揚分消水勢則火氣自降火降水消金無所畏肺亦何所顧忌而不鳴哉此症亦可用冬

茯苓貝湯

蘇葉三錢麥冬二兩貝母三錢茯苓五錢水煎服二劑而聲出

人有勞損弱怯喘嗽不寧漸漸瘖啞氣息低沉人以爲肺氣之絕也誰知是腎水之涸乎夫肺爲腎之母本生腎

者也肺母自病何能乳子腎父不足日來取資於肺則子貧而母益貧矣子母兩貧伶仃苦弱氣息奄奄所謂金破不鳴也世醫謂金破必須補土然而脾胃雖能生金而補土之藥多屬陽藥用陽藥以補土則陽旺而陰愈消反有損於肺矣治法必須大補腎子之水子富而母自不貧况肺氣夜歸於腎子之宮將息安寧勞瘁之肺忽變爲逸樂之肺而又有津液以供肺母之用則肺金頓生自必氣息從容重施其清肅之令矣方用助音湯熟地一兩麥冬一兩北五味子一錢甘草一錢蘇子

一錢天門冬二錢貝母三分欬冬花五分沙參五錢地
骨皮三錢水煎服二劑而喘少平四劑而嗽少止連服
二十劑聲出矣再服二月斷不瘖啞也二月後前方加
人參五分山藥一兩茯苓二錢再服半年可變癆怯爲
平人矣此方補腎之中意仍注於補肺然補肺之中仍
是補腎所以能收已敗之功克奏將壞之績也

此症亦可用畱錢湯治之

熟地五錢欬冬花一錢山茱萸二錢麥冬五錢地骨
皮五錢貝母蘇子各一錢山藥
失實各三錢百部三分水煎服

人有口渴之甚舌上無津兩唇開裂喉中乾燥遂至失音

人以爲肺火之旺也誰知心火太旺乎夫肺屬金最畏者心火之尅肺也金氣已衰心中之火過於大旺未免刑金太甚煅煉銷燦金無清肅之氣惟有焚化之形欲求其音聲之踈越何可得耶治法必須瀉心火之有餘滋肺金之不足則火易息而肺可安矣雖然又不可徒瀉心火也蓋心之所以有餘者實因腎水之不足耳水衰不能制火火得遂其炎上之性倘不補水而徒瀉其火則火無水制服寒涼之藥反增其助火之焰所謂因激而成其橫也方用黃連三錢麥冬五錢玄參五錢生

地五錢桔梗三錢甘草二錢天花粉二錢水煎服一劑
聲出二劑聲响不必三劑方名鳴金湯瀉火而補腎存
其中全不見補腎仍是救肺之藥蓋肺腎爲子母救肺
正所以生腎水也腎水生而心火降矣

此症用加味元

冬湯亦可治

元參一兩丹參三錢麥冬二兩
北五味子一錢水煎服十劑全愈

瘟疫門

世有城市之中鄉村鎮店之處傳染瘟疫多至死亡其症必頭痛眩暈胸膈膨脹口吐黃痰鼻流濁水或身發紅斑或髮如焦黑或嘔涎如紅血或腹大如圓箕或舌爛頭大或脇痛心疼種種不一象形而名人以爲天災流行誰知皆人事召之也此症雖奇奇怪怪不可執一而論然皆火熱之毒不宣鬱而成之耳蓋火性炎上鬱則火氣不伸拂抑其性蘊藏於腹中所以大閉作熱熱閉成毒其由來者非一日也治法自宜大瀉其火毒以快

泄其鬱悶之氣第瀉火之藥未有不寒者也不先用
表散之味遽用寒涼火轉閉塞而不得達適所以害之
也故必須於散中用瀉則疫去如掃耳方用散瘟湯荆
芥三錢石膏五錢玄參一兩天花粉三錢生甘草一錢
黃芩二錢陳皮一錢麥芽二錢神曲三錢茯苓五錢水
煎服一劑病輕二劑病又輕三劑全愈此方瀉肺胃之
火者以瘟疫之熱多是二經之火也用荆芥以助石膏
黃芩瀉火而又散火也火散則熱發於外矣火瀉則毒
化於內矣火解毒消瘟神疫鬼何能作祟哉

余又聞南陽張真人之教謂瘟疫自來無方然方亦可
豫定以瘟疫皆熱症也去火退熱解邪逐穢未嘗不可
於難定之中以定一可救之劑也其方用大黃一錢荆
芥一錢生甘草一錢柴胡蒼朮川芎各一錢白芷五分
水二碗煎八分一劑回春此方較散瘟湯少異然散火
爲主其意正同瘟疫治法不可拘執又誌此方於後以
便治疫者之採擇也

伯高太師別號懷真子傳

錄

元天苦救湯治前瘟疫亦

甚效并附於後

苦參五錢元參一兩天花粉五錢三
味水煎服服一劑必無性命之憂

又云偶傳瘟疫眼角忽然大腫身子驟發寒熱喉嚨大
脹作痛數日之後卽鼻中出血口出狂言見人罵詈發
渴若飲之水則又瀉痢不止不過半月其人卽亡一見
眼角發腫卽用七星湯治之二劑卽愈若至瀉痢此方
不可救矣方另用加味木苓湯救之痢止則生否則不
救寧傳方以防疫不可有疫而無方故罄述之不敢隱
也二方載後

七星湯

治傳染瘟疫眼角忽然大腫身驟
發寒熱喉嚨大脹作痛罵詈發渴

玄參麥冬各一兩天花粉三錢甘草一錢荊芥二錢
神曲一錢桔梗二錢水煎服若鼻中出血加犀角一
錢切不可用升麻代
之寧用黃芩一二錢

加味木苓湯治前症瘟疫鼻中出血後飲水瀉痢白
米五錢茯苓一兩骨伸一兩甘草二錢車前子五錢
水煎服病止則
生否則不救

種嗣門

男子有交感之時婦人正在興濃而男子先痿陽事不堅
精氣射遠人以爲命門之火衰也誰知陽氣之大虛乎
夫氣旺則陽旺氣衰則陽衰此氣也乃五臟之真氣非
止命門之火也蓋命門原有先天之火氣然非五臟後
天之氣不能生世人戕賊五臟因而命門之火氣不旺
隨五臟之真氣而消磨矣又安能助命門之火乎此所
以半塗先痿也治法似宜急補五臟之陽氣也然而五
臟不必全補也但補其脾腎之氣若心若肝若肺之氣

自旺五臟氣旺而命門之火欲不旺得乎方用助氣仙丹人參五錢黃芪一兩當歸三錢茯苓二錢白朮一兩破故紙三錢杜仲五錢山藥三錢水煎服連服四劑氣旺再服四劑氣大旺自然久戰可以壯陽洩精可以射遠玉燕投懷矣此方補氣絕不補陰以病成於陽衰則陰氣必旺若兼去滋陰則陽氣無偏勝之快矣方又不去助火蓋氣盛則火自生若兼去補火則陽過於勝而火炎復恐有亢烈之憂反不種子矣此立方之所以妙也

此症用火龍丹

長服亦佳

人參五兩白朮五兩巴戟天杜仲兔系子麥冬各五兩肉苁蓉一大枚破故紙遠志肉桂各二兩黃芪八兩當歸三兩北五味一兩各爲末蜜爲丸每口酒送五錢服一月卽陽舉可以久戰矣

男子有泄精之時止有一二點之精此等之人亦不能生子人以爲腎水之虧誰知是天分之薄乎夫精少之人身必壯健予謂天分之薄誰共信之殊不知精少者則精不能盡射於子宮得天之厚者果如此乎天旣予人以薄醫欲逆天而予人以厚似乎不可得之數矣然天心仁愛人苟有遷善之心醫卽有種子之法蓋精少者

雖屬之於天未必不成之於人也恃強而好用其力苦思而過勞其心多食而反傷其胃皆足以耗精也苟能淡漠以死其心節少以養其胃益之補精添髓之方安在精少者不可以多生乎鐸得逢異人秘傳實有添精神術今著書至此不敢隱忍不傳傳之以救萬世無子之人也方用生髓育麟丹人參六兩山茱萸十兩熟地一觔桑椹乾者一斤鹿茸一對龜膠八兩魚鱉四兩兔絲子四兩山藥十兩當歸五兩麥冬六兩北五味三兩肉苁蓉六兩人胞二個柏子仁二兩枸杞子八兩各爲

細末蜜搗成丸每日早晚時用白滾水送下五錢服三
月精多且陽亦堅安有不種子者哉此方妙在純用填
精益髓之味又無金石之犯可以久服而無害不特種
子而得八元兼可延齡而至百歲卽名爲百歲丹何不
可者

此症用漆精嗣續
丸長服亦甚佳

人參鹿角膠龜板膠山藥枸杞子各六兩山茱萸肉
麥冬兔絲子肉茯苓各五兩熟地黃魚鱉炒巴戟天
各八兩北五味一兩柏子仁三兩肉桂一兩各爲末
將膠酒化入之爲丸每日服八錢服二月多精而可
孕矣

男子有精力甚健入房甚久泄精之時如熱湯澆入子宮
婦人受之必然吃驚反不生育者人以爲久戰之故使
婦女興闌以致子宮謹閉精不得入熟知不然夫胎胞
居於心腎之間喜溫不喜寒然過寒則陰凝而胎胞不
納過熱則陽亢而胎胞難受交感之際婦人胎胞之口
未有不啓安有茹而吐之乎惟是過於太熱則口欲閉
而不能中欲受而不得勢不得不棄之於外以享其清
涼之快矣是以婦人坐娠數十日經來者正坐於受胎
而復墮非外因之傷乃精熱之自難存養也然則欲胎

氣之永固似宜瀉火之有餘矣而火不可瀉瀉火必致傷胃反無生氣何以種玉乎治法但補其腎中之水使水旺而火自平方用平火散熟地一兩玄參五錢麥冬三錢生地二錢丹皮二錢山藥三錢金釵石斛三錢沙參三錢水煎服連服十劑精不過熱與婦女交接便可受胎且慶永安也此方補陰而無大寒之虞瀉火而有生陰之妙無事解氣自獲退炎之益宜男之道卽在於斯何必加知母黃柏大苦寒之藥以求奏效哉

此症用鎮陽丸

長服亦佳

熟地八兩生地茯苓麥冬山藥地骨皮沙參各四兩
牛膝天門冬車前子各二兩玄參八兩各爲末蜜爲
丸每日白滾水送下五錢服
一月而精溫和可以納矣

男子有泄精之時寒氣逼人自難得子人以爲命門之火
衰極誰知心包之火不能助之耶蓋命門之火生於下
必得心包之上火相濟則上下相資溫和之氣充溢於
骨髓之中始能泄精之時無非生氣倘命門有火以興
陽而心包無火以濟水則命門之氣散安能鼓其餘火
發揚於精管之中哉世人治法但去助命門之火不去
益心包之焰則精寒不能驟復必難受胎矣方用溫精

毓子丹人參二兩肉桂一兩五味子一兩兔絲子三兩
白朮五兩黃芪半斤當歸三兩遠志二兩炒棗仁三兩
山茱萸三兩鹿茸一對肉蓯蓉三兩破故紙三兩茯神
二兩柏子仁一兩砂仁五錢肉果一兩各爲末蜜爲丸
每日酒送一兩服一料精變爲溫矣夫無子因於精寒
今精寒易爲精熱安有罷熊之無夢者乎况此溫中有
補雖助心包之炎仍是益命門之氣二火同溫陽春遍
體謂不能生子者吾不信也

此症用勝寒延嗣
丹長服亦效

人參六兩白朮黃芪兔絲子巴戟天鹿角膠淫羊藿
各八兩附子一箇茯苓炒棗仁各四兩山藥六兩遠
志肉桂各二兩炙甘草一兩廣木香五錢肉苁蓉一
大枚各爲末蜜爲丸每日早晚各服三錢服兩月精
熱而孕矣附子用生甘草三錢
煮湯一碗泡透切片微炒熟

男子有精滑之極一到婦女之門卽便泄精欲勉強圖歡
不可得且泄精甚薄人以爲天分之弱也誰知心腎之
兩虛乎夫入房可以久戰者命門火旺也然作用雖屬
於命門之火而操權實在於心宮之火蓋心火乃君火
也命門之火相火也心火旺則相火聽令於心君火衰
則心火反爲相火所移權操於相火而不在君火矣故

心君之火一動相火卽操其柄心卽欲謹守其精相火
已暗送精於精門之外至於望門泄精者不特君火衰
極相火亦未常盛也治法補心火之不足不可瀉相火
之有餘蓋瀉相火則君火益衰耳方用濟火延嗣丹人
參三兩黃芪半斤巴戟天半斤五味子三兩黃連八錢
肉桂二兩當歸三兩白朮五兩龍骨一兩煨山茱萸四
兩山藥四兩柏子仁二兩遠志二兩牡蠣一兩煨金櫻
子二兩芡實四兩鹿茸一具各爲末蜜爲丸每日白滾
水送下一兩不拘時服一月卽改觀服二月可以堅守

服三月可以久戰服一年如改換一人此方心腎兩補不專尚大熱之藥故可久服延年非惟健陽生子但服此藥必須堅守三月不戰始可邀長久之樂否則亦不過期月之壯種子於目前已也

此症用補天育麟丹亦佳妙

鹿茸一具人參十兩山茱萸熟地肉苁蓉巴戟天各六兩炒白朮炙黃芪淫羊藿山藥芡實各八兩當歸蛇牀子兔絲子各四兩柏子仁肉桂各三兩麥冬五兩北五味瑣陽各二兩太胞一箇火焙海狗腎一根蛤蚧兩條黃連一兩砂仁五錢各爲末蜜爲丸每日早晚各送五錢服二月可以久戰生子矣無海狗腎可用大海馬二箇代之不用蛇牀子可用附子七錢代之附子用甘草三錢煮湯泡浸製

男子身體肥大必多痰涎往往不能生子此精中帶濕流入子宮而仍出也夫精必貴純濕氣雜於精中則胎多不育卽子成形生來亦必夭殤不能永壽者也凡人飲食原該化精而不化痰今旣化爲精如何有濕氣入之不知多痰之人飲食雖化爲精而濕多難化遂乘精氣入腎之時亦同羣共入正以遍身俱是痰氣腎欲避濕而不能也濕旣入腎是精非純粹之精安得育麟哉治法必須化痰爲先然徒消其痰而痰不易化蓋痰之生本於腎氣之寒痰之多由於胃氣之弱胃爲腎之關門

非腎爲胃之關也內經年久譌寫誤傳世人錯認腎爲胃之關門矣胃氣先弱不能爲腎閉其關門腎宮又寒內少真火之運用則力難燦乾濕氣水泛爲痰亦且上浮而不止下降矣故治痰必當治腎胃之二經健其胃氣而痰可化補其腎氣而痰可消矣方用宜男化育丹人參五錢山藥五錢半夏三錢白朮五錢芡實五錢熟地五錢茯苓一兩薏仁五錢白芥子三錢肉桂二錢訶黎勒五分益知一錢肉豆寇一枚水煎服服四劑而痰少再服四劑痰更少服一月而痰濕盡除交感亦健生

來之子必可長年蓋此方補腎者十之三健胃者十之七胃健而脾更健以胃強能分消水氣何濕之入腎乎腎又氣溫足以運用卽有水濕之入腎自能分泄於尾閭則精成爲純粹之精生子全美必然之理也

此症用純一九

長服亦妙

白朮山藥芡實各二斤薏仁半斤肉桂四兩砂仁一兩各爲細末蜜爲丸每日服一兩服一月卽可得子男子有面色痿黃不能生子者乃血少之故也卽或生子必多乾瘦久成兒癆之症人以爲小兒不慎飲食之故或歸咎於生母乳汁之薄誰知父無血以予之乎世人

生子動曰父精母血不知父亦有血也夫血氣足而精亦足血氣全而精亦全爲父者氣有餘而血不足則精之中自然成一偏之精雖倖成形烏能無偏勝之病哉先天無形之血能生後天有形之血也若後天有形之血何能生先天無形之血乎故雖食母之乳吞肥甘之物終不能生兒之血以全活之也然則爲父者少血烏可不亟爲補之哉惟是血不能速生必補其氣蓋血少者由於氣衰補氣生血又何疑乎方用當歸補血湯黃芪五錢當歸一兩熟地五錢水煎服夫補血宜用四物

湯矣今不用四物湯者正嫌四物全是補血而不補氣也若補血湯名雖補血其實補氣原方用黃芪一兩當歸五錢者重在補氣而輕在補血也我今用當歸爲君用黃芪爲臣佐之熟地之滋陰是重在補血輕在補氣自然氣以生血而非血以助氣氣血兩旺無子者易於得子根深本固寧至有天殤之歎哉

此症用滋血繩振

丸長服亦效

黃芪二斤當歸麥冬熟地巴戟天各一斤各爲末蜜爲丸每日早晚白滾水送下各五錢服二月血旺生子必長年也

男子有懷抱素鬱而不舉子者人以爲命門之火不宜也
誰知心肝二氣之滯乎夫火性炎上憂愁則火氣不揚
歡愉則火氣大發而木性條達摧阻則木氣抑而不伸
悠揚則木氣直而不屈處境遇之坎坷值人倫之乖戾
心欲怡悅而不能肝欲坦適而不得勢必興盡致索何
風月之動於中房帷之移其念哉久則陽痿不振何以
生子雖然人倫不可變境遇不可反而心氣實可舒肝
氣實可順也吾舒其心氣則火得遂其炎上之性吾順
其肝氣則木得遂其條達之性矣自然木火相通心腎

相合可以久戰以消愁可以盡歡以取樂宜男之道亦不外於是矣方用忘憂散白朮五錢茯神三錢遠志二錢柴胡五分鬱金一錢白芍一兩當歸三錢巴戟天三錢陳皮五分白芥子二錢神麴五分麥冬三錢丹皮三錢水煎服連服十劑鬱勃之氣不知其何以解也因鬱而無子鬱解有不得子者乎方中解鬱未常無與陽種玉之味倘改湯爲丸久服則鬱氣盡解未有不得子者也

此症用通與丸

長服亦佳

白芍一斤當歸熟地白朮巴戟天各八兩遠志二兩
炒棗仁神麴各四兩柴胡八錢茯神六兩陳皮八錢
香附天花粉各一兩各爲細末蜜爲丸每日白
滾水送服四錢服一月懷抱開爽可以得子矣

男子有天生陽物細小而不得子者人以爲天定之也誰
知人工亦可以造作乎夫陽物有大小者世分爲貴賤
謂貴者多小賤者多大造物生人歟於此必豐於彼雖
然賤者未常無小貴者未常無大蓋人之陽物修偉者
因其肝氣之有餘陽物細小者由於肝氣之不足以陰
器爲筋之餘也又屬宗筋之會肝氣旺而宗筋伸肝氣
虛而宗筋縮肝氣寒則陰器縮肝氣熱則陰器伸是陽

物之大小全在肝經盛衰寒熱之故也欲使小者增大
要非補肝不可然而腎爲肝之母心爲肝之子補肝而
不補其腎則肝之氣無所生補肝而不補其心則肝之
氣有所耗皆不能助肝以伸其筋助筋以壯其勢故必
三經同補始獲其驗矣方用奪天丹龍骨二兩酒浸三
日然後用醋浸三日火燒七次用前酒醋汁七次焯之
驢腎內外各一具酒煮三炷香將龍骨研末拌入驢腎
內再煮三炷香然後入人參三兩當歸三兩白芍三兩
補骨脂二兩兔絲子二兩杜仲三兩白朮五兩鹿茸一

具酒浸透切片又切小塊山藥末炒五味子一兩熟地
三兩山茱萸三兩黃芪五兩附子一兩茯苓二兩柏子
仁一兩砂仁五錢地龍十條各爲細末將驢腎汁同搗
如汁乾可加蜜同搗爲丸每日早晚用熱酒送下各五
錢服一月卽見效但必須堅忍房事者兩月少亦必七
七日具大而且能久戰射精必遠含胎甚易半世無兒
一旦得子真奪天工之造化也

鐸

傳方至此不畏犯神明之忌者不過欲萬世之人盡
無絕嗣之悲然天下人得吾方亦宜敬畏爲心生兒爲

念慎莫戲媼縱慾尙自耗其精非惟無子而且獲癆瘵
之病 鐸 不受咎也

此症用展陽神丹亦

奇絕并傳於世

人參六兩白芍當歸杜仲麥冬巴戟天各六兩白朮
兔絲子熟地各五兩肉桂牛膝柏子仁破故紙各三
兩龍骨二兩醋煅瑣陽二兩蛇牀子四兩覆盆子淫
羊藿各四兩驢鞭一具人胞一箇海馬兩對蚯蚓十
條附子一箇肉蓯蓉一枝鹿茸一具照常製各爲末
蜜爲丸每日酒送下五錢服二月改觀三月偉然可
以久戰而生子矣但必須
保養三月始驗否則無功